

佛說是決已迦羅越子逝天帝釋及諸比丘
聞經歡喜皆前爲佛作禮而去

佛說逝童子經

佛說月光童子經一名申日經

西晉三藏法師竺法護譯

聞如是一時佛遊於王舍城靈鳥頂山與大
比丘十千人俱聖通無礙悉皆應真漏結已
解生死已斷穢冥已索慧明獨存菩薩二萬

神通聖達都統三世總攝諸法權慧無方逮
佛神德住無所住爾時世尊遊於王舍大城
之中廣演道義開化群生天地神祇海靈鬼
神帝王臣民三界衆生皆來稽首共禀神化
世無佛時邪道興隆猶如冥夜炬燭爲明天
下有佛群邪盡歇譬如日出火無復光國中
本事外道邪見不蘭迦葉等六師佛以正真
之道訓教天下是時六師盡廢不見信奉諸
異道等心懷嫉妬謀欲毀佛還望敬事於是
六師召其門徒合衆弟子會於一處共集論

議吾等道德高遠名著四海衆儒共宗國主
所奉人民男女莫不信仰於十六大國盡世
供養吾德如風民應如草靡不稽首吾等足
下者今佛出世現道德神化吾等便爲捐棄
不見信奉乃令我等飲食不甘坐卧不安出
入行步恒懷愁憤心中鬱毒志欲發狂當作
何計以毀辱之逐使出國令人不見爾乃還
復吾供養耳共議此已各相謂言羅閱大城
之中有勢強長者國相大臣名爲申日信奉
吾等執心不二恒毀佛道以爲虛僞唯有此

人勢力威強能助吾等毀辱除之於是六師
即從座起將五百弟子到王舍城詣申日家
申日見諸師來即下正殿迎爲作禮施好榻
几美食畢盥拱手對坐諸師告曰吾等故與
大衆俱來造長者欲議一事願垂聽省申日
白言唯蒙訓誨願樂受聞六師俱曰吾等此
國之師功名勲著群儒稽首國主致敬大臣
所奉於十六大國獨言隻步長者所知佛出
於世自稱聖智幻術欺巧倒正反說競與吾
等列聖並智齊威等神迷惑人民國人愚冥

信奉其道疑亂天下沮敗善心更謂吾等無
有道德不見信奉長者勢強帝王所欽國人
信服威震四海天下望風深惟師徒終始重
義記功列勲傳之來世願爲吾等毀辱除之
令滅不見復吾供養豈不快哉長者啓曰敬
承來告憶昔往日我之愚兄奉佛之故毀辱
諸師從此已來實懷忿恚每欲規圖執事靡
由今被聖教合我本心當展力効畢命盡節
諸梵志曰吾向共議欲令長者於門鑿作五
丈六尺深坑以炭適半細鐵爲椽薄土覆上

設衆飯食以毒著中若火坑不焚毒飯足害
便往請之佛自云三達之智神通無礙照見
未然明禍福之源吉凶之趣實無此分而但
誑惑萬姓審有此智當不受請若無此智必
自受之今欲以此規圖於佛申日聞之欣然
大悅讚言善哉誠如大師之所教勅此謀深
密高妙實爲奇異以此圖之何憂不獲輒如
聖教作火坑毒飯嚴以待之爾時不蘭迦葉
五百弟子見申日計共謀同歡喜踊躍不能
自勝咸共起住同聲舉手稱讚申日善哉真

佛七

十四

是聖明第一弟子申日重啓今自憂之必自嚴辦比令明日諸師當見長者作禮諸師各還於是申日勅外嚴駕導從前後便詣佛所下車却蓋解劒脫履拱手直進稽首足畢長跪白佛唯然世尊飢渴神化樂仰清風世事多緣恭敬靡由今故請見稽首稟化佛告長者明爾至心向於如來申日啓曰明日欲設微食唯願世尊與諸聖衆降德屈神是時世尊愍其狂愚欲濟脫之默然受請申日內喜心自念言果如規計禮畢辭退過六師所諸

師迎問爲受請不申日啓言承諸師威力已受我請果如所圖諸師及五百弟子皆大歡喜不能自勝諸梵志等並喜並言長者速還作火坑毒飯嚴以待之申日還家勅外密令中門外掘作火坑毒飯嚴以待之長者有子名曰月光厥年十六天姿挺特儀容端正博第七通群籍貫綜神模天文地理靡不照焉高名動世群儒師仰慈愍於世生死之苦降德普濟欲度衆生諫父申日佛爲大聖三界之尊道德清淨言教至真三達之智慈悲喜護心

過慈母當蒙得度更興逆惡希望天福豈不
惑哉昔者世尊求道之日坐於道場元吉樹
下第六天魔見佛高遠三毒以滅穢真已索
慧明獨存神聖無上諸天所宗上帝親下萬
神侍衛內懷嫉妬心中煩毒念其道成必當
勝我飲食不甘伎樂不御即昇正殿博問群
臣議設方計毀敗其道群臣啓曰菩薩神聖
道力無上威震三界德服十方非是臣等所
可向謀於是魔王赫威奮發震曜天地召其
鬼兵興軍聚衆帶甲億萬旌旗曜日光曜蔽

天宣勅士衆皆使變化奇形異類數百千種
蟲頭人軀鬼魅可畏擔山負石口眼吐火圍
遶菩薩齊聲蹋地牛吼唱叫震動八荒山崩
地裂樹木摧折海水波蕩涌沸六源溢流浩
汗高波滔天百姓驚怖巢木栖山潛龍妄踊
鰲鳥驚翔師子懼竄金翅鳥王摩竭大魚順
流低仰群臣怖悸逃走遁藏千變萬化群兇
相將毒氣逆類彌漫縱橫一時集惡向於世
尊佛直以慈心布施之力舉手指之群惡鬼
兵自然退散魔王失利頭前畫地群惡鬼兵

一時躋地齊心叉手願自歸佛當于爾時如
來應時即便降伏彌天之惡以爲弟子雖獲
得勝無有喜想以是方之火坑毒飯何足言
也須彌之毒大千刹火刀劍矛刃亦不能動
佛一毛也今以火坑毒飯欲毀於佛譬如蚊
蚋之勢欲墜太山蠅蠓之翅欲障日月徒自
毀悴不如早悔首過免罪天龍鬼神世間人
民梵釋魔王莫不稽顙受佛化者如來之身
金剛德體衆惡盡滅萬善積著相好光明神
器無喻永除五道之大冥獲無上正真之獨

明處衆聖之上猶星中之有月如日初出照
於朝陽廣陳道化教世群愚懷慈四等愍傷
衆生施恩濟苦心過慈母佛之道德神化如
此願父改悔歸命三尊爾時長者申日罪蓋
所蔽心不開解告子月光假使如來之德如
子所歎佛有神通照見未然當豫知我作火
坑毒飯今何以故受吾之請以此推之知無
遠慮月光復言佛實有三達之智六通三明
大慈四等靡不貫綜常度愚惑不逆人意申
日心迷執愚不捨明旦遣人請佛使者受教

輒詣尊所長跪白佛長者申日啓言日時已
至飯食已具唯願大衆降德自屈爾時世尊
心自念言今受申日之請不與常同當放威
神感動十方令于心服必就大道廣化無涯
并化六師及九十六種道於時世尊放大光
明上照三十三天下徹十八地獄極佛境界
皆大光明神通菩薩羅漢緣覺梵釋天王海
靈地祇及諸鬼兵各將部黨億萬無數聞度
申日皆來詣佛稽首足畢翼從左右佛告諸
比丘携持應器當就長者申日之請諸比丘

咸曰受教肅然嚴待地作金色當佛頂上七
步香雲紅黃青紺紫白蓮華自然涌出夾道
兩邊佛步出門告空無吉祥菩薩六十萬人
在前導從或行虛空或現於地佛處中央其
餘無限之衆皆隨佛後光明赫奕過日絕月
晃照一切天施寶蓋華下如雪天龍飛鳥不
敢歷上三界衆生無見頂者天樂皆下同時
俱作毒蟲隱伏吉鳥翔鳴佛不蹈地相輪印
成光明晃晃七日熾盛寶樹藥樹諸衆果樹
辟倪巔峨低昂如人跪禮之形閱叉金翅魔

鬼魅鬼各將營從莊嚴分部千百爲衆手執
妓樂或持香華七寶瓔珞天繒幡蓋十方來
會天人亦下樂器亦鳴盲視聾聽瘖言蹙行
怨憎和慈迷悟醉醒婦女釵釧相振作聲飛
鳥走獸皆作人形百歲枯木自然葉生餓鬼
飽滿地獄安寧琵琶箏笛擊鼓亂鳴佛以神
德變化火坑即成七寶紫紺浴池八味正水
底有金沙邊有蓮華魚鼈黿鼉池中喜踊飛
鳥走獸音樂相和池邊行列絲竹衣樹樹間
皆懸羅縠綈縵珊瑚寶樹水精瑠璃爲枝葉

紫磨黃金爲繩連綿交錯樹間垂天瓔珞互
相連結風起吹之轉相振觸妙音百種自然
宣出歎佛神德至未曾有皆說無常苦空非
身之聲使悲者更喜喜者更悲其七寶樹上
則有群鳥孔雀鸚鵡金翅鳥王赤髻神鳥鳳
凰吉鳥拘耆那羅羯鞞之鳥比數百千光色
顯赫群飛樹間哀鸞百種感動人情咸來集
聽走獸息食飛禽止聽形異心同歸命世尊
當于爾時海靈地祇三界衆生其來會者見
火坑變化爲浴池天地震動神變若此道德

殊絕皆看申日申日見之心動神驚衣毛起
豎憶惶怖悸精神失守心自念言咄哉迷惑
我之逆惡所爲無道顧謂六師坐汝畜類沉
吾湯火我今如何六師恐怖慙恥無言懼獲
重禍即各逃竄於是申日與子月光夫人姝
女眷屬男女外道伴黨俱出迎佛逢觀世尊
洪焰輝赫晃若寶山天姿紫金巨容丈六神
顏從容諸根寂定相三十二好八十種天中
之天道德堂堂十力世雄天人中王佛以神
德照愚冥心申日意解如迷得正狂病瘳除

五情內發悲喜交集即便首罪五體投地稽
首作禮唯然世尊恕我盲冥不識正真用信
惡言與毒害意欲危天尊幸賴慈化乞原罪
咎垂哀接濟得免大罪願前就坐即時如來
昇于正殿衆會已定申日慙怖心不自安前
白佛言爲盲冥所誤信妖邪之言以爲真諦
如狂服藥病更益劇始今覩佛邪病得除所
爲無道飯食之中悉皆著毒不可供養以御
大聖願待須臾更嚴食具佛告長者便持飯
來不須更設貪婬瞋恚愚癡邪見世之重毒

原七

十九

吾無此毒毒已滅盡毒不害我申曰下食香
徹八難餓鬼得安食已行水眾會寂然申曰
退坐垂泣啓言唯然世尊恕我迷惑敢圖逆
惡向於如來自揆罪重當應入地獄湯火痛
拷長夜受苦將脫何由佛爲大慈三界之救
愍念衆生濟於塗炭昨不誠我令我罪成得
無世尊不豫知也佛告申曰昔定光世尊授
我蒞時汝却後無數阿僧祇劫當於五濁世
中作佛廣度衆生如我今日當有長者申曰
火坑毒飯規圖害汝我乃爾時得慧明三昧

時已豫知汝姓字況於昨日而當不知申曰
歡喜世尊乃豫知無數劫事我既覺悟會得
免罪令我盡心自歸於佛所爲之非願令重
罪而得微輕佛本有誓不捨愚惑即告申曰
善哉長者能自覺悔重罪必除吾當爲汝廣
說道義令汝心解對曰唯然天中天願樂欲
聞畢死善道盡心不忘即時世尊聲揚洪音
出八種聲演萬億音廣說無量法言八解四
諦三脫六度深道法要微妙之行解三界空
諸法因緣造爲罪福觀病選藥如應說法申

日情悟一旦皎然心開疑解結除懼然無想
寂然入定即於座上逮得不退轉以歡喜踊
躍身昇虛空去地百四十文從空來下稽首
于地嗚佛足摩佛足長跪自陳今已覺悟從
佛得度欣然歎佛十力雄哉如來神力震伏
十方無敢當者火坑毒飯豫自消亡佛無憂
哉一切刀劍所不害傷劍戟刀刃皆化作華
佛勇猛哉如來皆能降伏邪道九十六種異
口同音皆歎大道佛金剛哉佛若金山晃照
一切闇冥壞敗慧火獨明超度群聖之上德

過虛空辯才不盡開闡法言告于大千伏諸
剛強令使熟成威震三界獨而無侶離諸塵
勞淨若天金雨諸法寶飽滿一切施以無盡
七寶之財觀心選藥先壞魔兵如應開法靡
不得度九十六種邪道隱蔽當于申日歎佛
法時無限之衆其來大會皆樂法音得福得
度不可稱計天地震動樂器作聲第七梵王
宣闡法言琵琶磬鼓千種妙樂自然而鳴忉
利天帝華散佛上歎佛聖德至未曾有當此
之時莫不歡喜稽首作禮

佛說月光童子經

佛說申日兒本經第七
申日是長者之子也

劉宋天竺三藏法師求那跋陀羅譯

聞如是一時佛在王舍國止鷄山中時國王
邊大臣長吏人民莫不敬重受教戒者佛教
國王長者吏民皆令不得殺生盜竊犯他人

婦女不得兩舌惡口妄言綺語不得嫉妬慳
貪狐疑當信作善得善作惡得惡已所不欲
莫施於人其有學餘異道不受佛教戒者國
王長者吏民皆不復敬所以不敬者非正道
也教人不以道德身自殺生教人殺生身自
盜人財物教人盜人財物身自犯他人婦女
教人犯他人婦女身自兩舌惡口妄言綺語
教人兩舌惡口妄言綺語身自嫉妬慳貪狐
疑教人嫉妬慳貪狐疑其國中有一四姓長
者字爲申日財產甚富金銀珍寶無央數申